

群之滅其生，得無過乎？」噫！至人之視革囊，夢幻泡影耳。苟有利於眾生，則棄如涕唾。餒虎飼鷹，皆以是心也，豈凡夫執吝四大者所測知耶！

贖養生命

陳，法朗，徐州沛縣人。就大明寺寶誌禪師學禪，精律論，譽動京畿，聽侶雲集。所得檀賜，用造經像、塔寺，濟給窮厄。見諸生命，即買歸畜之。鵝、鴨、雞、犬，充切房內，見朗寢息，皆寂無聲；遊觀之時，群起鳴吠，喧於鼓吹，亦懷感之致歟？

悲敬行施

隋，靈裕，定州鉅鹿人，十五，投趙郡應覺寺出家。博通經論，名藉海內，其行施也，悲敬兼之，惠袈裟數過千領；疾苦求療者，醫藥無算。但得厚味，必先奉僧；雖禦畜類，未嘗呵唾。乃至責問童稚，誠約門人，自稱己名，號彼仁者，苦言懇切，聞者流淚焉。

買放生池

隋，智者大師，居臨海，日見民以漁為業，罾網相連四百餘里，江麓溪梁六十餘所。心憫之，乃以所得覲施買海曲為放生池，表聞陳主。

陳主下敕禁採捕。因為立碑，詔國子祭酒徐孝克為文。辭甚悽楚，覽者悲悟，多感化焉。

割耳救雉

隋，智舜，趙州人，北遊亭山，庵其中。有獵者逐雉，雉入舜房，舜苦勸免，不聽，因割耳與之；獵人驚悟，投弓放鷹，數村捨其獵業。每見貧餒，流淚盈面，解衣減食，無所不至。

贊曰：軻氏云：「至誠而不動者未之有也。」，於舜老驗之。